

道光遵義府志

遵義府志卷十八

木政

前漢書蜀郡嚴道有木官而西京宮殿未聞以岨峽
檀栢岷山梓柏輪將作者蓋亦與鹽官橘官等耳史
冊中惟唐開元間漕西山竹木至明嘉隆乃屢下蜀
中採木之議而遵義木場遂與馬湖等處併受其厄
力役之費動數百萬勞民傷財極矣雖擇近水者乘
潦而下而百千中僅一二達京師督採官且有老死
於山箐中者噫非無益之酷政歟

聖朝勤恤民艱縱有

欽工節費節勞無稍擾累邇來

堯階禹室更無所需懸嶂陰巖桐生茂豫轉嘆良材美木
產此無用之區而猶厯

聖天子之仁育也顧不幸哉

明

嘉靖二十六年奉天殿災遣工部侍郎劉伯躍開府
江陵總督湖廣川貴採辦大木旋以憂去以左副都
御史李憲卿代之乃分派參政繆文龍入播州踏勘
播州之木有儒溪建昌天全鎮雄烏蒙龍州蘭州之
木竝屬四川巡撫督率採運

歸有光左副都
御史李公行狀

按陳志四川建昌產杉木馬湖永播而下產楠木
歷代南中不賓斧斤無得而入焉明洪武初年建
置城郭都邑冊封蜀王營建藩府皆取蜀材永樂
四年詔建北京行宮勅工部尙書河南宋禮督木
前後凡五入蜀監察御史顧佐亦以採木至而少
監謝安在蘭州石夾口採辦親冒寒暑播種爲食
二十年乃還正德六年乾清宮灾勅工部侍郎兼
右僉都御史安福劉昂巡撫總督營建正德十一
年又遣郎中李寅催督採木嘉靖五年勅工部右
侍郎兼右僉都御史黃衷督木九年勅巡撫右僉

都御史鉅野宋滄兼督木十九年議建獻廟勅右副都御史戴金督木憂去婺源潘鑑來代二十二年採辦枋板以巡撫都御史史進賢張梟兼督二十六年三殿災勅工部右侍郎劉伯躍督木憂去徽州李憲卿代四十五年修建承天等殿巡撫都御史宜黃譚綸兼督木萬曆十二年慈寧慈慶兩宮災巡撫都御史雒遵兼督木二十四年三殿災巡撫都御史兼督木三十五年災巡撫都御史喬璧星兼督木明史食貨志採木之役自成祖繕治北京宮殿始永樂四年遣尙書宋禮如四川禮言

有數大木一夕自浮大谷達于江天子以爲神名其山曰神木山遣官祠祭十年復命禮採木四川仁宗立已其役宣德間時採時罷宏治時停四川採木正德時採木湖廣川貴嘉靖元年革神木千戶所及衛卒二十年宗廟災遣工部侍郎潘鑑副都御史戴金于湖廣四川採辦大木二十六年復遣工部侍郎劉伯躍採于川湖貴州又遣官覈諸處遺留大木郡縣有司以遲悞大工逮治褫黜非一竝河州縣尤苦之萬厯中三殿工興採楠杉諸木于湖廣四川貴州費銀九百三十餘萬兩徵諸

民間較嘉靖年更費呂坤萬曆二十五年陳天下
安危疏有云卽以採木言之丈八之圍豈止百年
之物深山窮谷蛇虎雜居毒露常多人烟絕少寒
暑饑渴瘡癘死者無論已乃一木初臥千夫難移
倘遇阻艱必成傷殞蜀民語曰入山一千出山五
百哀可知也又如海木官價雖株千兩比來都
下爲費何止萬金臣見楚蜀之人談及採木莫不
哽咽苟損其數增其值多其歲月減其尺寸而川
貴湖廣之人心收矣按此疏入不納

萬曆十四年播州宣慰使楊應龍獻大木七十材美

賜飛魚服

明史士司傳

二十三年播州宣慰使楊應龍論斬得贖輸四萬金

助採木

王鴻緒明史稿

三十五年巡撫喬璧星兼督木

四川通志

議略該本司左布政使湯自昭右布政使王應麟會同署印按察司劉禹謨看得今次採辦大木通共二萬四千六百一根塊查得萬曆二十四年估計規則共約用銀三百六十三萬餘兩除虎尾保水二色杉木緣上次未奉派採價值亦無則例先已揭報本院裁酌外查得萬曆二十四年奉文採

木彼時本司庫貯尙有二百五十餘萬金與征播之需相兼支發而分派州縣自行採買者又所費不貲僅完二運若今次所派木枋數倍往額而司庫積貯罄竭無遺且川省自先年兵火之後疊罹災荒閭閻愁苦物力凋耗累年正賦尙多積欠未完今議額外加徵亦恐未易爲力茲奉部議堪以畱用者四司料銀贓罰商稅稅契缺官奉薪數項而已查得兩院贓罰鹽課及鹽稅稅契事例等銀每年湊足十萬四百餘兩解赴陝西濟邊四司料價歲額一萬九千四百餘兩三十五年分已解部

訖缺官俸薪原無常額數亦不多惟有每歲商稅一半該銀一萬五千兩他如南京麀皮事例稅契等項俱堪畱用總之每歲不過四五萬兩曾不足當十分之一此外百計搜求別難措處誠莫知所爲計矣除見行通查各府州縣見有庫貯遵義一道原係產木之區但新疆甫定物力空虛似難獨任應就近併附上川東道爲一總而量加其派額其虎尾保水二項杉木及門工亟用巨材責成上東下南二總在上東者除遵義外再加分派於下東在下南者量行分派於上南建昌等處採辦以

充頭運之數一應事宜除督木道專任通行督理外仍行七總各道將分派木數轉行所屬府州若何而選委能官若何而招商採辦若何而驗木給銀若何而到江發運一聽從長計議隨宜處分要在無拂商民之心而共濟公家之事此最今日第一議也至若合用錢糧數累巨萬俱毫不可缺亦不宜緩者今求之帑藏既積貯無多欲俟之請撥又緩急難濟惟有先行加派庶濟目前之急也查得川省錢糧俱以丁糧起派合計通省額糧除浮糧番糧外實徵稅糧共九十七萬六千四百五十

三石八斗二升零人丁八十八萬一千七百四十
六丁若驟加徵派恐民力不堪合無先行量派每
糧一石每年除原額外今加派銀五錢人丁一丁
除原額外加派銀五分照征播事例不許優免仍
聽該道查考務責令州縣正官定限追比彙解各
該府州庫貯聽候司道行文支放不許拖欠不許
稽遲自萬厯三十六年分起至採運完日停止凡
招商採買僱募運夫等項卽以前項銀兩支給并
不許僉報殷實承買亦不許編派運夫入山是民
間雖有一時加賦之苦而較之先年官民俱擾貧

富并累者相去懸絕或亦人情之所樂趨也他如招商驗木給價起運等項尙有許多節湊許多區處通候司道議妥至日另詳外今將前議二款先行呈請伏候本院裁奪再照今次派採大木數倍往額且鴻巨異常如一號楠杉連四板枋此等巨木世所罕有卽或間有一二亦在夷方瘴癘之鄉深山窮谷之內尋求甚苦伐運甚難今者瘡痍未起以熒熒予遺之民任此艱難重大之役其何以堪查得嘉靖二十六年間以三殿採木其木板一萬五千七百一十二根塊萬厯二十四年以兩宮

採木其五千六百根塊以今日所派較之嘉靖年間幾於一倍較之二十四年多至四倍矣多積於官固可以待用而併取諸民實力所不堪職等竊謂額派之數宜減部文派採定爲三運其頭運部文限三十六年以內到京而門工巨材且限春運計期已在睂睫間而錢糧未惜商賈未集合式之材不知其在山在水非有神輸鬼運之術何以卒辦且川省去京極遠奉文最遲卽水運之程越歷江河逶迤萬里由蜀抵京恆以歲計矧加以採伐挽運之繁乎查萬厯二十四年奉文採木至二十

五年起解頭運二十六年到京二十七年起解二
運二十九年到京今次木巨數多尤爲不易故職
等竊謂運解之限宜寬也夫無米之粥巧婦難炊
千鈞之任衆擎易舉今茲大役約費四百餘萬金
而專責之一隅之物力是卽杯水車薪之喻耳今
查本省庫貯剩存及民間加派爲數無多不敷支
用此外惟有請發內帑外省協濟而已第今工役
繁興水衡告匱封樁雖富檢發未聞似難輕率舉
行惟是題畱解京錢糧如四司料價贓罰商稅契
稅缺官俸薪鹽稅茶稅事例等項銀兩併量畱歲

解陝西濟邊銀十萬餘兩此雖戶部額餉而以前數卽令陝西措解各邊准作協濟本省之數亦無不可其他省分非爲重大役工者俱令量行協濟多者十萬餘金少者五六萬兩卽請工部定派省分行令各照數速解以濟然睂諒急公之義各有同心或不至秦越相視也至於雲南先年用兵借過川省銀共四十萬兩除上次採木取還并征播議解貴州助餉外尙欠一十九萬六千餘兩又三十二年借過司庫銀五萬兩今止還一萬二千兩尙欠三萬八千兩俱未解還今當此多事之秋該

省有唇齒之誼前項借支急宜償還得此資助亦猶之乎協濟矣故職等又謂支費之資宜裕也凡此皆目前急務不容緩圖而又不敢以擅專者伏乞本院特疏題請部議俞允所謂寬一分而民受一分之賜庶幾物力稍充而大工亦易舉矣四川通志黃輝採木記採木國家鉅役也費至重力至勞是天下之所無奈何而不可以已者也詎宜以可奈何之心當之而姑爲如得已之法行之哉自明興迄今不知爲役凡幾慮無不督責有司而拮据民運者於國得矣如民何大中丞聚垣喬公以丙午

入蜀理木政者六年於茲痛鑒已事九郡各簡一
賢佐主之而直隸州六主以刺史召商採辦民唯
所號令焉更念役重賦繁公私困訓會疏題請減
派額寬解限議協濟請內帑設專道皆報可始於
民間照丁糧量加賦一年此外毫無干預焉初中
丞鎮蜀日塗播故無何復憤蜚蠅之恣虐赤我郊
原則多方勸分振濟粥而藥之民乃稍稍有起色
而上亦念夜郎兵燹後方慙慙歲大旱頻仍復事
採木其毋乃不堪命已感中丞繪圖抗疏備極忠
懇聖母聖上泊宮中咸爲憫惻合賜金五萬特遣

使臣宣布詔命萬里推轂西入斜谷至蜀郡徧賜
勞獨羸閭閻屋咸舉手加額乃知上及聖母后宮
之仁聖雖高居九重乃心罔不在赤子卽胼胝謁
蹶其何以報萬分一廼立章程告戒凡我在事如
有踵襲故弊僉派滋擾偷安糜費者以白簡從事
有司受命凜凜又下令曰訪聞涪夔間有附近亡
賴假託土商詭故影射欺官商在遠私移斧記改
飾僞號而串同守戶別立契券矚有各處漂流巨
材輒圖姦騙捏詞誣諫官商多被挾誣訟端閃爍
難可止斷遷延時日徼幸計得官商橫遭局騙因

之悞事貽害無窮自今敢有舞智行私作姦犯科者司道究遣法無貸申飭再四而亡賴之徒奉法唯謹於是上下一心萬衆響應邪許湏洞聲震陵谷無翼而飛不脛而馳右涪左夔望質如歸連艘率簿蔽江東下計八千餘株參天翳日皆清廟明堂之選也木政告成里中縉紳士民動顏相慶移書不佞曰自中丞視木政凡六稔矣博考前事罔不以民采者大戶義民隨意僉報編夫派米需索津貼剝膚椎髓民不聊生白骨枕藉自李直指方麓公首倡官采之議僉曰然中丞接部檄毅然以

官采從事蓋二百四十餘年所未有也而奉行自
中丞始是役也派木二萬四千六百有奇價至四
百萬而僅加一歲賦仗國家威德幸告竣事皆中
丞之有造於三巴也太史盡記之以垂永永史輝
氏曰吾生又二歲一甲子耳而采運凡四髣時聞
長老傳述猶髣髴記之逮丙申采運則典在太史
矣大都肅皇末政權焰四爍訶讓聲嘗自二千石
以下義民大戶惴惴股栗僅僅成事丙申之役民
夫餒死相望數郡怨苦之蓋吾生與木政俱今而
後知木之有政也先是嘉州守徐學周目擊采運

之苦著采木哀鳴錄款列凡六難中丞公讀而傷之曰險阻艱難誰親於其身嘗之者誠嘗之雖曰百難可也故木政雖督厲勤至而撫綏愛養殆不遺力云往中丞貴邑少司空楊公和洪熙元年奉命采木於蜀至今二百餘年而中丞再領茲役焦唇乾肺以爲民求萬有一分之便因以想見楊公之苦心焉以不恆有之役不忍見之苦而一邑之中中丞與司空兩肩其事豈不異哉夫人臣之誼不過捐軀爲國耳然用之伐叛剿逆則功高而名顯用之采木則竹帛不書人固有幸不幸耳雖然

漢柏流香泣秦彌甚海濱騰葉望雒長飛弱植表
異於一時而光物必傳於後世王彌胡寬名且不
泯安在其竹帛不書邪今中丞洞曉物情妙施調
劑算無再計舉卽萬全掃民運而爲官導經營之
大竅若喬中丞者可謂高出千古矣續補全蜀藝文志
天啓間設督木道一員駐札涪州招採木商人任文
鼎等領銀入遵義屬採辦無成拘任文鼎等下涪州
獄追銀明末張賊入川始越獄逃去陳志

國朝

康熙六年工部議建

太和殿需用大楠木請

勅下四川湖廣等處督撫稽查現有採就木植或山中出產
木植長徑尺寸根數需用錢糧確估限文到兩月內
報部酌議七年四川巡撫張德地親至遵義等處踏
勘云木雖有山險無江難于挽運先後題報三疏備
陳艱險康熙八年二月內奉

旨修造宮殿所用楠木不敷酌量以松木湊用已經有旨令
著停止採取該撫速回省城料理地方事務乃罷

遵郡紀事

附張德地題報勘採遵義地方楠木疏略題爲請

旨事康熙六年九月初一日據署四川布政司事按察使李

獬霄呈稱八月十四日准遵義道移據遵義府據
正安州申稱遵郡原係播彝舊地改土設流山瘠
土薄從未產有長大楠木卽間有產者并不堪大
工之用且正安不通水路由綏陽桐梓綦江重慶
入江其陸路之險奇峰深壑斜坡側徑空行之人
攀躋維艱若拽運重木動經多人則寸步難移倘
遇直路每日尙可那移一二里一遇轉折曲斜不
能掉轉查平播在明萬厯年間彼時地方蕃庶人
民稠密從未運出一木若不預陳終難結局除一
面細查木植夫匠數目道里遠近造冊申報又據

桐梓縣申稱縣屬蘆溪里地名陳頭巖後水箐產
有楠木大小共一十二株除長短圍圓路程人夫
錢糧鹽菜等項備造清冊申齎但桐梓不通水路
必須運至綦江始能上筏入江萬山如懸一線鳥
道自改流以來從未運出一木況值此人力艱微
之日似有萬難者今奉憲駁理合具結申報又據
綏陽縣申稱查得綏陽產木處所實不通水路必
由桐梓綦江至重慶入江一路羊腸鳥道峭壁懸
巖空行之人亦難若登天如拽重木必需多人一
遇曲折狹徑并深澗斷壑必架廂填砌砍伐方可

一日拽移二三里遵造奉冊具結申報又據仁懷縣申稱縣屬雖有所產楠木皆在深箐人跡不到之處至於砍伐非比平地木植可以隨用斧斤高箐之中必須找廂搭架多人夫纜索方可修巔去頂盤根此砍木之難一也若夫產木處所盡屬危巖峭壁卽空行尙須扳藤附葛楠木一株動須人夫百千方能拽動而山路險窄亦難立足山勢曲折不能并走勢必開山填砌找廂搭架所用人夫非比泛常拽運工程難以日計此搬運之難二也至於上筏之處必由河溪水道而山谷一線廻

水皆係亂石填阻若非天雨旬日則水不盈尺勢
必從下流築堤截壅蓄水丈餘方可順流拽運然
須逐路築堤蓄水始能前進若遇頑大亂石阻當
又必多用石匠鑿去振洩漏水相地形之高下用
轉移之權變事難爲程限此上筏之難三也憲行
駁查不得不據實申報又據遵義縣申報縣屬原
無產木不致隱匿甘結申報各等情到府該卑府
覆看得採取楠木奉督撫兩院駁查今據正安桐
梓綏陽仁懷四州縣回報因并遵義縣不致隱匿
印結等因到道該本道覆看得正綏桐仁四州縣

造報楠木根株并陸續轉江以及需用人夫錢糧等項逐款登答前來覆核其木株之多寡冊內已各稱某地產幾株長若干圍圓若干矣覆核其水陸運之所經冊內已各稱從某至某矣獨是每株大小應用夫數并估報口糧鹽菜既無成例可以折衷惟有伏候憲裁酌奪耳等因到司該本司查看得楠木乃

工之必需蜀當繁庶之時培植頗多柰自蹂躪之後濱水州郡及腹內稍坦之地人跡所到無不焚燬殆盡且二十年來荒草茂盛以致佳木凋落故棟梁

之材絕爲稀少本司自奉行後仰遵部限屢催查報柰各屬俱報十無一有卽再三嚴駁不過願甘具結今幸催到遵義道查報樹株長徑尺寸前來竊幸可答部命但慮深山大箐峭壁懸巖人跡從來罕到距水最爲隔遠現在踏勘猶號艱難則將來伐運之費誠不易爲力也除各屬具結嚴駁合將遵義道所報樹株冊籍呈報憲裁具題等因到臣據此該臣看得部行需用楠木事關

欽工何敢草率溷覆業經咨部展限在案實因蜀罹奇慘之後民物盡絕卽巨樹良材咸遭焚伐且無培植

求其千百年長養拱抱堪爲

朝廷棟梁者誠不能如當年之可指畫而得也臣查蜀誌所載馬湖永播素產楠木屢經嚴檄駁催今據署布政司按察使李紳霄造報遵義府屬查勘樹株尺寸夫匠錢糧數目前來其樹株之果否合式堪充

上川下等未敢懸定應聽部議作何分別酌量示行卽此現在查報之木亦俱產於林箐深麓之中巖險谿窄採運倍難拽移至江萬分艱遠需用夫匠浩繁所費錢糧不貲既據該司呈報到臣自應先行據實

題報以聽部核除將原冊印結送部外臣謹會同
督臣苗澄合詞具題伏乞

皇上睿鑒勅部議覆施行

陳志

又採木條議疏題爲敬陳採辦楠木之法上可無
悞

欽工不致糜費錢糧下可確實辦運不致累及殘黎事竊
照採辦楠木關係建

殿急需

臣冒險夷方遍至產木處所盡爲查勘前至馬湖

竝遵義查出楠木株數丈尺圍圓另疏題報外臣
查各州縣所報之木雖有大小長短之不同臣親

披荆負棘直至各箐山頂踏勘而棟梁巨材各箐之中大約皆可採辦以資

國用但其箐之大者周圍有五六百里其小者亦有一二百里非一朝一夕可以盡悉必須按日細查方可採取如離小溪五十里至百里者猶可採運若百里之外者山勢愈峻道路愈險雖有大木無可如何臣隨傳綏陽縣查出舊時木廠附近居民吳之壘梁維棟任明選等三人親問採木之法據供故明時綏陽設有一廠地名南宮北掃當日設有督木道一員駐涪州有督木同知一員專管錢糧架

長斧手俱係湖廣辰州府人奉上司文著落辰州府召募來川人夫係本官召募架長看路找廂找廂者卽墊低就高用木搭架將木置其上以爲拽運之說也斧手伐樹取材穿鼻找筏人夫拽運到河用石匠打當路石筏匠做纜子鐵匠打斧頭與一應使用器具一廠用斧手一百名石匠二十名鐵匠二十名筏匠五十名找廂架長二十名楠木一株長七丈圍圓一丈二三尺者用拽運夫五百名其餘按丈尺減用沿路安塘十里一塘看路徑長短安設一塘送一塘到大江九月起工二月止

工三月河水泛漲難以找廂放工先於七月內動
人夫五十名尋茹纜皮堆集廂上取其滑以拽木
每夫日支米一升僱工銀六分斧手架長日支米
一升僱工銀一錢督木同知將放出木頭赴督木
道交割八十株找一大筏召募水手放筏每筏用
水手十名夫四十名差官押運到京等語據此又
據署遵義府事成都府通判馬御世會同各州縣
列款條議到臣臣酌古準今因革損益恭列數款
爲我

上陳之

一督木之官宜專也

臣

查故明採辦設有專官

管理木廠一應錢糧出入召募六匠等事此其專任今以臣管見於馬湖應設一廠遵義應設一廠每廠用督木同知一員凡採辦事宜專其責任令其設法分頭覓採果能廉能辦事急公奉法則聽臣獎勵若糜費錢糧擾害地方聽臣題參一切錢糧出入木植已完未完聽臣綜核報銷庶賞罰明而知懲勸錢糧不致糜費地方不致擾害而

欽工克有濟矣 一夫役宜預爲召募也產木之處人民無幾卽盡其州縣之老壯男婦不過一二百人卽俱充木夫不能運一木沉大工一舉刻不容緩四

川有土無民久在

睿照勢必於附近富庶省分募人夫五千名押送來川分給
兩廠拽運庶人夫既足方可按時採辦計日運解
不致有悞限期 一斧手架長宜提取也查採木
舊例斧手架長俱出湖廣辰州府其斧手砍伐穿
鼻架長尋路找廂皆其慣習各有定法若不得其
人木料必致撲損勢必於辰州府召募斧手二百
名架長四十名押送來川分給兩廠庶安頓布置
得宜而巨材易於伐運矣 一棟梁之材宜請定
式也若不先定丈尺株數則錢糧夫匠之多寡難

以懸度合無請明長椿丁人圍園若干人定爲號
數若干株以便按式採取若木數既定則木植之
大小距江道里之遠近用工之多寡方可照數估
計錢糧確實不致浮冒一錢糧宜預請撥也四
川遠在天末若待起工方請部撥而往返稽遲動
需半載未免有悞大工合無俟內部議定合式楠
木若干株預行酌撥錢糧若干兩先運來川以資
夫匠工銀米菜之需有餘則存畱別支不足再請
撥給總於運木到京之後總造清冊報部核算庶
錢糧旣足不致臨時掣肘一木商斷不宜用也

臣查故明初年專官採辦事克有濟及至末年信
用木商領銀採辦一經入手任意花銷且於採木
地方動以皇商爲名索取人夫種種擾害以致里
民驚逃銀歸烏有究竟竝無一木得濟實用雖將
奸商監迫徒株連無辜終無抵償此輩係亡命棍
徒又無功名可戀身家可惜是以斷不宜用恐致
糜費錢糧貽害地方一找筏完結入江起運宜
逐省撥夫遞送也蜀省到京水程最遠約有年餘
若不逐省遞送誠恐沿路遲滯查馬邊二府小溪
俱會合於重慶大江由重慶而下夔關徑通湖廣

若木植運抵楚界必須逐省沿途州縣撥水手人夫遞送前去仍各具不致耽延印結報部庶各有專責無違滯之虞矣以上七款出_臣管見至於需用夫匠錢糧必請自部撥若責令僱募夫匠到廠之日照舊時採運之例匠役架長日支米一升銀一錢夫役日支米一升工價銀六分而犒賞之費不與焉若於外省提撥但於日支米一升之外量給鹽菜銀兩而已應否採擇統候內部從長議覆請自

審裁康熙八年二月初四日題_{通訓}

按德地三疏其一與遵義無關茲不錄

二十二年奉部文採楠杉二木郎中齊檣會同四川巡撫杭愛踏勘部議令各官捐俸採運會馬湖知府何源濬署下南道條陳五事部議杉木免運楠木仍運一半會新撫姚締虞悉蜀情形

陞辭面陳難狀

上諭令親查可否締虞至蜀與檣檢率本省幹員減從裏糧身歷險阻據實以

聞適松茂道王隲陞口北道入

觀縷陳山險籌深水微溝曲累民費帑終無實際情由奉

旨停免先是檣締虞入遵沿籌探勘合法者識焉地方官民
護視惟謹至停免檄下乃已遵人曾鐫石紀其事立
今學院旗垵處惜不存遵事

附王隲疏大工需材甚殷民力實寡謹陳見聞仰
祈

睿鑒以免遺悞以安殘蜀事該臣案康熙二十四年七月初
一日工部議覆四川巡撫韓世琦題報採運楠杉
捐輸銀兩數目竝稱全蜀戶口寡少夫匠等項請
派附近之陝西湖廣等省分協幫一疏奉

旨四川人民稀少且屢經兵火困苦已極採辦楠杉等木甚

是艱難起運若派別省民夫絡繹解送必致大累小民今
各省所報起解木植數目曾否足用著查明確議具奏見
報之日全蜀臣民莫不感泣嵩呼咸頌我

皇上明見萬里之外幸蜀省鋒鏑殘黎瘡痍未起復慶更生
有路也後經部議各省應解杉木足用將四川應
用杉木四千零五十五根免解所有各省應解楠
木不敷梁柱等項於四川所報需用楠木四千五
百零三根內扣除免運共一千八百餘根仍令運
送二千六百六十三根奉

旨依議欽遵在案是四川楠杉二木邀

恩已免十分之七矣建造

太和殿近係外國之觀瞻遠係

聖子

神孫萬年之基業採運木料臣下職分子來其在民心艱難
豈忍置喙但事有勉強竭力而後可爲者有勉強
竭力而終不能爲者臣在蜀五載略有見聞今當
代觀敢避斧鉞不以入告上負

皇上視民如傷之念下負臣子事君盡忠之義所有蜀土山
川險易之勢蜀民轉運艱苦之情敢爲

聖明陳之蓋四川四面環山巉巖虧蔽惟城都府境左右稍

稱平衍所產并無大楠臣曾出勘產木處所如沙坪灌口賈家山何家山等處俱屬峻嶺懸巖運路自山抵江或百餘里或七八十里所經由者俱屬深澗幽壑一溪之行紆折幾盤必費多力而始轉一石之塞橫亘長川必待暴雨而後過較他岡阜迴逾千倍此臣之所見也至若遵義馬湖等府之楠木大材尤俱產諸高山窮谷老箐密林之中非獨人跡不到卽鳥道亦稀前撫臣杭愛登山督察時遙望一木所在必緯拽始至其地足胝履穿攀藤骨戰側身亦苦難立砍伐何以施工臣嘗細訪

輿論皆謂今存大楠因其斧斤難施所以在山長
年至於運道崎嶇罄竹莫盡其尤甚者如遵義府
屬之落水孔猪鬣孔細鱗洞麈子峽曲折之字拐
彎天生橋三個洞葫蘆洞水從洞中流出又下魚
硿須搭天橋長三百六十餘丈等語馬湖屬內則
有高硿赤巖黑巖偏橋板鬼溪猪鬣巖弔藤巖九
溪三渡水等處峭壁乾溝亂石壅塞山水旋長旋
涸不能濟運等語此臣之所聞也卽以參考古法
採取必須找廂搭架拽運必須墊低就高輾轉上
下木在溪澗利於泛漲木在山陸又以泛漲爲累

故陸運必於春冬水運必於夏秋忽水忽陸非可
一直而行計日而至其大概然也臣伏讀

諭旨採辦楠杉等木甚屬艱難固已密悉

聖聰矣如使民力稍可足用竭力所當勉圖顧四川幅員雖
廣滿目祇有荒煙百里竟無半竈當進兵運糧時
疲病死亡鄭圖難繪臣伏讀

諭旨四川人民稀少且屢經兵火困替已極又已密悉
聖聰矣幸托

天威蕩平數年以來老弱安生瘡痍漸起但以通省之戶口
總計之仍不過一萬八千九十餘丁是合全蜀數

千里內之人民不及他省一縣之衆就中抽撥五千入山採辦楠木其供送衣糧器具者勢不可少又將千百遣發饋送動用遠者千里近者數百里耕作必致全廢

國賦誰爲輸將且度山度嶺多恐失墜風棲露處怵懼虎狼種種情狀不能殫述且蜀值風鶴之後民情慣聽訛傳前察木時工猶未動聞風私逃攜妻挈子拋棄室家若實在動工用夫之際豈不遠則他徙近則走險乎其採運之艱難人民之稀少民情之搖惑如此四川楠杉雖已解運十分之一而所運

用之大木二千二百六十三根斷不能如他省之解運者可以按數按期而至也

殿工不容少稽川運誠恐致悞臣請

勅四川撫

臣姚締虞親詣產楠處所查勘應運楠木有設法

竭力可以砍伐者其若干株有雖設法竭力而不能砍伐者其若干株其不能砍伐者俟奉

旨之日定奪其可以砍伐者星速採取趨運俾百姓曉然共知惟視其力之所可爲而不強其力之所必不能爲各守本業踴躍從事不致狂惑竄匿庶殘疆子遺頂戴

如天好生之德同覆載以無疆而工料亦見實効矣

臣蒙

任口北道參議運楠事宜固非職掌但臣任蜀已久熟悉情形仰體

上愛養小民軫念殘疆至意敢就在蜀所見所聞披瀝實陳事屬條陳運楠事宜字多逾格貼黃難盡如果芻蕘可採伏乞

全覽施行

四川通志

雍正四年建造

平吉地需用楠杉木植等項奉

工部查照舊例啓奏朕亦不便改換例但楠木難得如果
不得卽松木亦堪應用其備辦此等木植自京城差遣官
員不免騷擾地方卽交與總督巡撫著動正項錢糧地方
官果係實心料理如不尅漏錢糧事情自然有濟欽此四
川巡撫憲德等遵辦自六年起至十一年止其
採合式楠木一千七百三十八件半黔江縣知縣鄧
州彥夔州府通判汪志敏保寧府同知王愿彭縣知
縣王煥墊江縣丞彭陟等先後分運赴通交收

附憲德疏畧據布政使管承澤詳稱除移川東道
通行所屬一體遵照採買購覓及續據不產楠木

之各府廳州縣出具不致容隱印結在案惟據產楠木之馬湖府屏山縣巴縣廣元洪雅犍爲丹稜宜賓汶川井研納谿遵義正安綏陽仁懷桐梓南川等府州縣各詳稱所產楠木必得能通大江附近水次者方能轉運今所產合式楠木俱在萬山之中盡屬懸巖峭壁既不能直達大江又無附近水次難以砍伐運送等情除陸續駁飭再加確查果否難以轉運外查有附近水次稍易運送之崇慶州眉州雅州灌縣四處已得合式楠木一百四十四根枋十一塊應請先行採辦起運送京所有

已得楠木件數丈尺徑寸一併造冊呈齎等情前來臣查既有附近水次合式楠木一百四十四根枋十一塊應卽先行運送以應

欽工隨檄飭布政司動支庫銀分發崇慶等四州縣照時價給發不許分毫剋扣作速採辦起運至重慶府交總理川東道參議陸賜書專員送京除咨會採辦楠木各省撫臣竝冊分送部科外理合題報至馬湖等府州縣果否難以轉運現在嚴檄確查其採辦運送合式楠木一百四十四根枋十一塊動用銀兩數目容臣檄令核實造冊另疏題報

乾隆十五年

萬年古地工程需用大楠木一十二根夔州府知府許國棟
於黔省桐梓縣屬之平頭山石筴溪等處採辦一十
二根餘木二株保寧府通判楊道國管運赴通交收
二十四年復需大料楠木六根重慶府知府林興泗
江津縣知縣彭維銘於黔省桐梓縣屬之石河觀夜
郎坡等處採獲六根候補同知孫輝管運進京

並同

遵義府志

卷十八

七

遵義府志卷十八

遵義府志卷十九

阮冶

唐志載濠州土貢丹砂而採冶無聞焉宋阮冶在川湖者數十所元歲課朱砂水銀于四川思州鉛錫于湖廣靖州明礦冶在川湖雲貴者幾于無處蔑有然皆不及播可知丹砂諸物非遵義所常有不得以前代曾經入貢視爲定產也

國朝以來丹砂銀礦採驗無效白鉛則旋開旋停非明徵歟宋志曰山澤之利有限或暴發輒竭或採取歲久所得不償其費而歲課不足有司必責主者取盈

重爲民累遵義冶場卽坐斯病自嘉慶初

恩旨嚴行封閉仍罪私開遵民仰沐

深仁永得聊生安業矣茲具著探停始末俾來者考其無益
勿輕言利孔也

康熙二十九年遵義縣平水里報產丹砂請設廠開
採遵義府知府蔡毓華往勘諭之曰丹砂產于土厚
薄可知只藏奸害民遺累地方耳不許臺司已聞之
欲開採復詳止之

遵義縣事

康熙四十四年川楚無業游民復報遵義縣產砂之
地與產銀礦之地在北鄉者大籬壩西鄉者小紅關

東鄉者曰對插煙巡撫能提督岳鍾琪各遣官來
遵協同地方文武踏驗以無濟止不開採上同

雍正十年開採正安州江里銀硯山鉛廠無效旋奉

文封閉

蘆洲詳續

乾隆四十二年貴州巡撫圖題准開採遵義縣新

寨綏陽縣月亮巖等白鉛廠每出鉛一百斤抽課二

十斤官買四十斤通商四十斤其抽獲課餘鉛斤運

赴二郎灘供兌京鉛無歲課定額是年共出鉛一百

餘萬斤四十三年以後每年出鉛僅二三十萬斤之

間尋復遞減至六十年遵義府知府嵇承孟以硃老

山空具詳嘉慶元年貴州巡撫馮光熊題奏奉

旨封閉

蘆洲
詳贖

附嵇承孟詳查卑府屬之新寨月亮巖等白鉛廠
係乾隆四十二年內前撫憲圖■題准開採每出
鉛百觔抽課二十觔餘鉛八十觔官買四十觔通
商四十觔其抽獲課餘鉛觔運赴二郎灘供兌京
鉛等因歷年遵照辦理竝無定額惟查該廠開採
之始雖草皮浮礦尙堪採煉自四十三年以後浮
礦挖盡卽行短絀每年出鉛僅二十八九萬至三
十萬觔不等較原案所載一百餘萬之數竟短十

分之七致奉部駁委員嚴查委係廠衰汁薄取結
加結詳奉覆准竝奉飭將廠費銀兩酌減在案前
任正署各府屢經設法調劑嚴督攻採無如該廠
竝無進山大礦不能有效旋將舊存灰沙淘洗冲
煉殊形竭蹶卑府到任屢經親身督辦飭令沙丁
竭力刨剗開採無如硐老山空所出鉛飭日少一
日在廠灰沙亦已淘洗淨盡若再因循勢必徒費
人工虛糜帑項所有新寨月亮巖等白鉛廠硐老
山空開採無益緣由不得不據實詳請封閉以省
糜累如蒙允准所有爐戶沙丁除別有事業先已

潛回者聽其自便其無業者卽欽遵

諭旨造冊移送別廠營生以免失所而杜滋事相應取具廠

民甘結加粘印結詳請查核委勘結報會詳

檔案

又抄咨戶部爲請封無益之礦廠等事廣西司案
呈戶科抄出貴州巡撫馮光熊題月亮巖新寨等
廠封閉一案嘉慶元年五月十四日題七月初十
日奉

旨該部議奏欽此欽遵於本日抄出到部該臣等查得貴州
巡撫馮光熊疏稱開採礦廠雖資人力全賴地利
方能採辦今新寨月亮巖等白鉛廠據遵義府知

府嵇承孟詳二三年前俱係將廠中廢礦灰砂及近廠草皮浮礦淘洗冲煉方能報獲二十八萬觔之數今礦引已盡又無子廠可採經護貴西道安順府知府檄委黔西州知州履勘竝該護道嚴加親勘委係硃老山空礦引淨盡該廠前後左右亦勘無一線礦引徒費人工調劑無益似應如其所請嚴行封禁以省糜累除將遵義府知府嵇承孟冊報乾隆五十九年八月起至六十年十二月底止出產鉛一十八萬一百六觔現在另行造冊報銷竝飭嵇承孟將存廠及二郎灘局鉛觔趕緊

鎔辦發運聽候撥兌外所有新寨月亮巖等廠硃
老山空礦引已盡應行封閉取具各結加具印結
由司詳報前來臣覆核無異除將各結送部外臣
謹具題等因前來查貴州遵義縣屬之新寨綏陽
縣屬之月亮巖等白鉛廠先于乾隆四十年據該
撫圖題明開採經臣部覆准行令照例抽課收
買運局供鑄在案今據該撫疏稱新寨月亮巖等
白鉛廠近年俱係將廠中廢礦灰砂及近廠草皮
浮礦淘洗沖煉方能報獲二十八萬觔之數今
礦引已盡又無子廠可採委員履勘委因硃老山

空礦引淨盡該廠前後左右亦勘無一線礦引徒費人工調劑無益應嚴行封閉仍令該撫轉飭該地方官嚴行封禁不時畱心稽察如有私行偷挖卽行嚴拿究治其未封閉以前抽課收貢鉛觔領過工本並實存銀鉛以及未運鉛觔運腳銀兩卽行造冊報部查核等因嘉慶元年九月十二日題本月十四日奉

旨依議欽

此爲此合咨前去遵奉施行

同上

按心齋隨筆遵義縣鉛廠在沙溪里泮水場側內有大海子小海子各一乾隆三十八年知縣羅存

德具報開採至四十二年大有成效督撫將熟悉廠務之大定知府姚學英對調遵義辦理學英隨請建官房竝西嶽廟至六十年硃老山空大虧工本知府嵇承孟詳請封閉

嘉慶十一年遵義縣民陳正興等仍請試採泮水鉛廠嗣無成效于十二年封閉

心齋
隨筆

十五年二月知府福寧阿又據遵義縣民羅大興等呈請試採泮水白鉛隨建官房一爐房二千十六年三月水敗礮硃全無成效查實封閉竝距官房十五里之福興硃礮硃二口一體封閉竝禁私採二十年

八月縣中游民呈請復開知府趙遵律親往察勘仍

行禁止

同上

道光十一年十二月貴西兵備道周廷授以廠民單
永新等呈報遵義縣屬西沙溪里之通達坪羊腸溝
等處山間露有白黑鉛礦現開礮硿九口已得礪砂
百萬餘斤爲縣役及地棍占據私燒佯以全行封閉
誑縣官札飭遵義府縣嚴查知府于國琇知縣繆玉
成遵勘得通達坪黃家灣等處山形微小四至俱于
民間田園廬墓有碍卽附近之白銀山九龍崗毘連
之馬鞍山一帶地方俱曾于嘉慶十五二十兩年先

後奉文封禁應請永遠禁閉仍嚴私開役棍另案究辦

十三年十二月署貴西兵備道史斌復以遵義縣人周占先等稟報縣屬沙溪里之通達坪羊腸溝楓香壩九嶺岡乾河壩白巖溝茅坪一帶露有白黑鉛礦引苗民已于道光十年內合夥曾經開挖礮硿九口接獲白黑鉛礦八尺餘高六尺餘寬探出礦砂萬餘畝遭縣役占據中止請給開牌斌隨詳巡撫高溥咨部隨札飭遵義府縣給牌令其試採一年有餘所出鉛斤幾不敷工本至十五年六月貴西道周廷授詳

請咨部將新廠核銷札飭知府文明署知縣石煦將開牌徹銷所有礮硃永遠封禁

二十一年九月綏陽縣奸民熊仕宗等糾集游民於綏陽縣正安州接壤之野茶垣聚寶山天緣山新山等處私採銀鉛將置廠知府黃樂之以多病民間廬墓且奸宄易藏滋擾可慮民食正歉騰貴堪虞嚴示禁止十二月巡撫賀長齡訪聞復嚴札飭令封閉二十二年二月樂之親往勘封私礮並申永禁

並禁册